

傷寒論集注

傷寒論卷第六

錢塘張志聰隱菴註

辨脉法

問曰脉有陰陽者何謂也。答曰凡脉大浮數動滑此名陽也。脉沉瀯弱弦微此名陰也。凡陰病見陽脉者生。陽病見陰脉者死。

此辨脉法之大綱也。脉之大體不離陰陽。陽脉陰脉其名不一。揆其大要。凡大浮數動滑五脉此名陽也。沉瀯弱弦微五脉此名陰也。夫診脉而別陰陽非爲脉也。爲

病也。凡陰病見陽脈，得陽盛生長之氣，故主生。凡陽病見陰脈，得陰寒消索之氣，故主死。凡病皆然，不獨傷寒也。○高子曰：大浮數動滑，五脈爲陽；沉澹弱弦微，五脈爲陰。舉其大槩而論，三陽三陰也。夫陽明脈大，太陽脈浮，少陽脈數，少陽之初陽上合陽明，其脈則動；少陰之癸水上合陽明，其脈則滑；以三陽論五脈者如此。又太陰脈沉，少陰心血虛，其脈濡；少陰腎精虛，其脈弱；厥陰肝虛，其脈則弦，不得少陽中見之氣，其脈則微。以三陰論五脈者如此。合通篇脈法，其中更有緩脈、緊脈、遲脈。

濡脉。結脉。促脉。亢脉。革脉。脉類雖多。皆可以陰陽而意會之也。

問曰。脉有陽結陰結者。何以別之。答曰。其脉浮而數。能食不大便者。此爲實。名曰陽結也。期十七日當劇。其脉沉而遲不能食。身體重大便反鞭。名曰陰結也。期十四日當劇。合下兩節。首節言陽結陰結。謂陰陽之氣各不相通。下節言陰虛則陽盛。陽虛則陰盛。而彼此相通也。夫脉始於足少陰腎。主於手少陰心。生於足陽明胃。心主神氣。內虛則陰陽上下不相交濟。而爲陽結陰結矣。浮數爲

陽脈能食不大便。爲陽證。以陽證而得陽脈。故此爲實。名曰陽結也。陽結者。陽氣自結。不得陰氣以相資也。劇甚也。期十七日當劇者。一日太陽。十七日當少陰主氣之期。陽氣固結。少陰三主氣而不能上濟。則當劇矣。此心主神氣內虛。少陰之氣不上交於陽。而爲陽結者。如此。其脈沉而遲。陰脈也。不能食。身體重。陰證也。夫陰證當下利。今大便反鞭。乃陰氣自結。而不得陽氣以相資也。期十四日當劇者。一日太陽。十四日當陽明主氣之期。陰氣固結。陽明三主氣而不能下濟。則當劇矣。此

主神氣內虛陽明之氣不下交于陰而爲陰結者如此。問曰病有洒淅惡寒而復發熱者何。答曰。云脈不足陽往從之。陽脈不足陰往乘之。曰何謂陽不足。答曰。假令寸口脈微名曰陽不足。陰氣上入陽中則洒淅惡寒也。曰何謂陰不足。答曰。假令尺脈弱名曰陰不足。陽氣下陷入陰中則發熱也。

此言陰陽彼此從乘而不同於陽結陰結也。惡寒者寒病也。寒病屬于陰。發熱者熱病也。熱病屬于陽。今洒淅惡寒而復發熱是寒熱相兼。陰陽交勝。故陰脈不足。陽

往從之而發熱。陽脉不足。陰往乘之而惡寒。夫陽脉陰脉。數之可十。推之可百。今但舉寸尺。故曰假令寸口脉微。名曰陽不足。陰氣上入陽中。則洒淅惡寒。乃陽虛惡寒也。假令尺脉弱。名曰陰不足。陽氣下陷入陰中。則發熱。乃陰虛發熱也。

陽脉浮。陰脉弱者。則血虛。血虛則筋急也。

合下三節。以血氣而論脉也。夫氣爲陽。血爲陰。故陽脉浮。陰脉弱者。則血虛。血虛則筋無所養。故筋急也。○或問陽脉陰脉。屬寸尺耶。屬浮沉耶。愚曰。陰陽者有名無

形不可勝數。會悟其旨。貫通于脉。觸類引伸。無非陰陽。若必居一于此。則吾豈敢。

其脉沉者。榮氣微也。其脉浮而汗出如流珠者。衛氣衰也。此以榮氣衛氣而論脉之浮沉也。夫脉沉爲陰。脉浮爲陽。故其脉沉者。榮氣內微也。其脉浮而汗出如流珠者。衛氣外衰也。

榮氣微者。加燒針。則血留不行。更發熱而躁煩也。上文論榮衛之氣。此節申明榮主血。而衛主氣也。榮氣微者。承上文而言也。復加燒針。傷其經脉。則血留泣而

不行陰虛陽無所附更發熱而躁煩也承上文而申言榮主血則知衛之主氣矣

脉藹藹如車蓋者名曰陽結也

合下五節承上文陽結陰結陽氣虛微陰血不足之意謂有是證必有是脉故爲效象形容以言脉也脉藹藹如車蓋者柔軟搖蕩虛浮于上不能內歸于陰故名曰陽結也

脉累累如循長竿者名曰陰結也

脉累累然如循長竿之節弦堅而濇不能上達于陽故

名曰陰結也。此擬脉象而申明上文之陽結陰結者。如此。

脉瞥瞥如羹上肥者。陽氣微也。

脉潛潛然如羹上之肥。浮泛於上。難以尋按。故曰陽氣微也。

脉縈縈如蜘蛛絲者。陽氣衰也。

脉縈縈然如蜘蛛之絲。細而極微。難以把握。故曰陽氣衰也。此擬脉象而申明上文之寸口脉微。尺脉弱并榮氣微。衛氣衰者如此。

脉綿綿如瀉漆之絕者亡其血也。

脉綿綿然如瀉漆之絕頭大而末小此陽氣外越陰血內虛不和于陽故曰亡其血也。此擬脉象而申明上文之血虛筋急血留不行者如此。

脉來緩時一止復來者名曰結。脉來數時一止復來者名曰促。脉陽盛則促陰盛則結。此皆病脉。

合下三節首節言陽盛則促陰盛則結。次節言陰陽相搏其脉則動末節言陰陽同等其脉則緩也。脉來緩者一呼一吸不及四至也。時一止者暫有停止不相續也。

復來者。暫一止而復來也。此緩而時止。乃陰氣有餘。陽氣不足。故此名爲結脈。脈來數者。六至爲數。亦時一止。復來者。乃陽氣有餘。陰氣不足。故此名爲促脈。夫陰虛陽盛。則促。陽虛陰盛。則結。故曰此皆病脈。

陰陽相搏。名曰動。陽動則汗出。陰動則發熱。形冷惡寒者。此三焦傷也。若數脈見於關上。上下無頭尾。如豆大。厥厥動搖者。名曰動也。

陰陽相搏。名曰動者。言陰陽皆盛。兩相搏激。而爲動脈也。兩相搏激。必有後先。若陽氣先動。而搏陰。則汗出。陰

氣先動而搏陽則發熱若陽動無汗陰動無熱但形冷惡寒者乃三焦陽熱之氣不能外出以溫肌肉充皮膚故曰此三焦傷也夫有動脈之義必有動脈之形若數脈見于關上上下下無頭尾如豆大厥厥動搖者名曰動也此因動脈之義而更爲效象形容者如此

陽脈浮大而濡陰脈浮大而濡陰脈與陽脈同等者名曰緩也

浮大陽也浮大而濡則陽中有陰陽脈如是陰脈亦如是陰脈與陽脈同等故名曰緩也緩者和緩舒徐不數

不動不結不促非不及四至之謂也。脉浮而緊者名曰弦也。弦者狀如弓弦按之不移也。脉緊者如轉索無常也。

合下二節申明弦脉有虛實之不同而其體皆勁急。故此節以弦脉合緊脉。下節以弦脉合革脉也。脉浮而緊者弦脉之象故名曰弦也。弦者狀如弓弦之勁急。雖按之而不移。所以申明浮緊名弦之義也。若但緊者如轉索之無常。非若弓弦之一線。此言正氣受邪其脉則弦。弦脉似緊而究不同於緊脉者如此。

脉弦而大。弦則爲減。大則爲芤。減則爲寒。芤則爲虛。寒虛相搏。此名爲革。婦人則半產漏下。男子則亡血失精。

此言正氣自虛。其脉弦。夫弦減大芤。而究同于革脉也。脉弦而大者。正氣自虛也。故弦則爲氣減。大則爲脉芤。氣減則爲寒。脉芤則爲虛。寒虛相搏。此名爲革。革者外勁內空。如按鼓革。婦人脉革則半產漏下。男子脉革則亡血失精。此弦減大芤。而致精血兩虛者如此。

問曰。病有戰而汗出。因得解者何也。答曰。脉浮而緊。按之反芤。此爲本虛。故當戰而汗出也。其人本虛。故當發戰。以

脉浮故當汗出而解也。若脉浮而數，按之不芤，此人本不虛。若欲自解，但汗出耳，不發戰也。

合下七節皆言病解。此節言戰而汗出，病因得解。又申明本虛則戰不虛則但汗出也。脉浮而緊，邪正相持之脉也。脉緊則按之當實，今按之反芤，芤則爲虛，故云此爲本虛。本虛故當戰而汗出也。夫本虛但當發戰，不能汗解，故申言其人本虛，故當發戰，以脉兼浮，故當汗出而解也。夫脉非但浮，浮而芤也。故設言若脉浮而數，按之不芤，此人本不虛。若欲自解，但汗出耳，不發戰也。

問曰病有不戰而汗出解者何也。答曰脉大而浮數。故知不戰汗出而解也。

此節言不戰而汗出。病得解也。上文言脉浮而數。此言脉大而浮數。同一義也。

問曰病有不戰不汗出而解者何也。答曰其脉自微。此以曾經發汗。若吐。若下。若亡血。以內無津液。此陰陽自和。必自愈。故不戰不汗出而解也。

此節言不戰不汗出而病得解也。其脉自微。氣血本虛也。此以曾經發汗。若吐。若下。若亡血者。言未病之先。或

始病之初。曾有發汗吐下亡血之證。以內無津液。故其
脈自微。其脈雖微。非同病過。故言此陰陽自和。亦必自
愈。所以不戰不汗出而解者。以此故也。

問曰。傷寒三日。脈浮數而微。病人身涼和者。何也。答曰。此
爲欲解也。解以夜半。脈浮而解者。漉然汗出也。脈數而解
者。必能食也。脈微而解者。必大汗出也。

此言傷寒三日。少陽內外樞轉而病解也。傷寒三日。乃
少陽主氣之期。脈浮數者。病在陽也。浮數而微。則得陰
氣以和之。且身涼和。故曰此爲欲解也。夜半乃陰盡之

時以陽得陰則解。故解以夜半。又申明脉浮而解者。少陽樞轉從外。故濺然汗出也。濺然者。微微外注也。若脉數而解者。少陽三焦氣盛。故必能食也。能食者。三焦和也。若脉微而解者。少陽之氣內入于陰。故必大汗出也。大汗者。陽加于陰而爲汗也。夫六篇中論邪病論治法。故皆言發汗而解。辨脉篇論正氣論脉體。故皆言自汗而解。

問曰。脉痛欲知愈未愈者。何以別之。答曰。寸口關上尺中三處大小浮沉遲數同等。雖有寒熱不解者。此脉陰陽爲

和平雖劇當愈。

此言三部脉平而病解也。

師曰。立夏得洪大脉。是其本位。其人病身體苦疼重者。須發其汗。若明日身不疼不重者。不須發汗。若汗激澀自出者。明日便解矣。何以言之。立夏得洪大脉。是其時脉。故使然也。四時倣此。

此言得四時之旺脉而病解也。

問曰。凡病欲知何時得。何時愈。答曰。假令夜半得病。明日日中愈。日中得病。夜半愈。何以言之。日中得病。夜半愈者。

以陽得陰則解也。夜半得病。明日日中愈者。以陰得陽則解也。

此言陰得陽。陽得陰。而病解也。

寸口脈浮為在表。沉為在裏。數為在府。遲為在藏。假令脈遲。此為在藏也。

合下四節言心主之神機。徹上徹下。徹內徹外。故上舉脈之寸口。下舉足之趺陽。以論神機之升降出入也。寸口脈浮為在表者。言寸口脈浮。主神機外行于膚表。沉為在裏者。言寸口脈沉。主神機內入于中土。數為在府。

者言寸口脈數主神機在六府之陽。遲爲在藏者言寸口脈遲主神機在五藏之陰。又曰假令脈遲此爲在藏者言神機不僅見于寸口不過假寸脈之遲以明神機之在藏而在表在裏在府亦猶是也。

趺陽脈浮而濇少陰脈如經者其病在脾。法當下利何以知之。若脈浮大者氣實血虛也。今趺陽脈浮而濇故知脾氣不足胃氣虛也。以少陰脈弦而浮。纔見此爲調脈。故稱如經也。若反滑而數者故知當屎膿也。

此言少陰如經則神機內轉而病在趺陽之脾胃也。趺

陽者足陽明冲陽之脉。動于足。跌故名。跌陽脉浮而濇。則土氣不和。少陰脉如經者。則神機自轉。其病在脾。病在於脾。故法當下利。又設言若脉浮大者。乃陽明土氣實。而少陰精血虛也。今跌陽脉浮而濇。故知脾氣之不足。胃氣之內虛。而病跌陽之脾胃也。夫所謂如經者。以少陰脉弦而浮。得春生上達之象。故稱如經之謂。脉而神機自轉。若脉不弦而浮。反滑而數。則少陰君火之氣。留滯於內。不能循經出入。故知當屎膿也。屎膿者。火熱之氣。內傷經脉也。

寸口脉浮而緊。浮則爲風。緊則爲寒。風則傷衛。寒則傷榮。榮衛俱病。骨節煩疼。當發其汗也。

上文假寸脉之浮沉遲數以明神機之外應。此言寸脉浮緊。榮衛受邪而神機不能外應也。寸口脉浮而緊。浮者陽脉也。風者陽邪也。故浮則爲風。緊者陰脉也。寒者陰邪也。故緊則爲寒。風邪爲陽。故風則傷衛。寒邪爲陰。故寒則傷榮。榮衛俱病。則神機不能從骨節而外出于皮毛。故骨節煩疼。當發其汗。則神機外應。而風寒之在榮衛者。亦藉汗出而外解矣。○愚按仲祖撰論。彙節分

章各有昭應。並非散叙平鋪。如此章四節。兩舉六口。跌陽。所以明神機之出入。上節舉表裏藏府。以明神機之外應。此節舉榮衛骨節。以明神機之不能外應。故曰骨節煩疼。當發其汗。言邪氣去。則神機旋轉。可從骨節而外應於皮毛之意。後人不參旨義。謂風必傷衛。寒必傷榮。欲以一言而該全論。不思寒亦可以傷衛。風亦可以傷榮。不思既在榮衛。何以復病骨節。既病骨節。何以復當發汗。抵襲糟粕而亡神理。致本論之終于蒙蔽也。門人曹自玉因愚言而請曰。先生開講本論。發前人所未

發精義入神。至真至妙。第此章論神機出入。何所據焉。
愚曰。試思在表在裏。在府在藏。何者在焉。是必神機之
旋轉矣。自玉樞掌嘆曰。誠哉精義入神。至真至妙也。鄙
意謂風寒之邪。在表在裏。在府在藏。今荷師教。因思風
寒之邪。既如是之在矣。何以又云風則傷衛。寒則傷榮。
若表裏藏府榮衛皆可傷也。後人亦不當泥定風傷衛。
寒傷榮矣。不探其原。祇泥其語。一人僱之。千百人和之。
害滋大矣。使成無已。在今日。亦當佩服師言。而易其說。
跌陽脉遲而緩。胃氣如經也。跌陽脉浮而數。浮則傷胃。數

則動脾。此非本病。醫特下之所爲也。榮內陷。其數先微。脈反但浮。其人必大便鞭。氣噫而除。何以言之。本以數脈動脾。其數先微。故知脾氣不治。大便鞭。氣噫而除。今脈反浮。其數改微。邪氣獨留。心中則飢。邪熱不殺穀。潮熱發渴。數脈當遲緩。脈因前後度數如法。病者則飢。數脈不時則生惡瘡也。

上節言少陰脈如經。則神機內轉。病在趺陽之脾胃。此言胃氣如經。則脾胃無病。榮衛內陷。而致少陰神機之病也。趺陽脈遲而緩。則土氣柔和。故曰胃氣如經也。若

跌陽之脈不緩而太浮。不遲而反數。浮爲虛。故浮則傷胃。數爲熱。故數則動脾。夫曰傷胃曰動脾。此非脾胃之本病。必治之失宜。故曰醫特下之所爲也。夫下之則榮衛之氣不能外行肌表。故榮衛內陷。而致神機之逆也。又申明所以致榮衛內陷者。其數先微而脾脈不和。脈反但浮。而胃脈不和。其人必大便鞅。則病在胃。氣噫而除。則病在脾也。何以言之者。言脾胃本無病。今何以言其病。故文爲反覆申明之。夫數則動脾。故曰本以數脈動脾。今其數先微。故知脾氣之不治也。故知大便之鞅。

也。故知氣噫而除也。今脉既反浮而胃脉不和其數既
改微而脾脉不和夫脉主于手少陰心脾胃之脉不和
故邪氣獨留於脉心中則飢者心主脉也邪氣者邪熱
也邪熱故不殺穀所以心中則飢而少陰大熱內盛也
熱者脾病也發渴者胃病也此非脾胃之本病榮衛
內陷邪熱留心而致脾胃之病也又推言數脉當遲緩
之時胃氣如經是脉因前後度數如法今病者則飢乃
因數脉不時之故夫數脉不時則大熱內逆故生惡瘡
此少陰神機之所以致病也由是而知脾胃無病因榮

衛內陷。致少陰神機之病。而及于脾胃者如此。師曰。病人脉微而瀋者。此爲醫所病也。大發其汗。又數大下之。其人亡血。病當惡寒。後乃發熱。無休止時。夏月盛熱。欲着複衣。冬月盛寒。欲裸其身。所以然者。陽微則惡寒。陰弱則發熱。此醫發其汗。使陽氣微。又大下之。令陰氣弱。五月之時。陽氣在表。胃中虛冷。以陽氣內微。不能勝冷。故欲着複衣。十一月之時。陽氣在裏。胃中煩熱。以陰氣內弱。不能勝熱。故欲裸其身。又陰脉遲瀋。故知亡血也。

合下兩節。皆言汗下宜慎之意。此言汗下失宜。陰血內

虛而脉微澹也。病人脉微而澹。陰血虛也。醫大發汗。又數大下。其人亡血。夫亡血陰虛。陽無所守。故病當惡寒。後乃發熱。無休止時。其惡寒也。雖夏月盛熱。而欲着複衣。寒之極矣。其發熱也。雖冬月盛寒。而欲裸其身。熱之極矣。所以致此者。乃陽微則惡寒。陰弱則發熱。又申明陽微者。此醫發其汗。而使陽氣微。所以陰弱者。此醫又大下之。而令陰氣弱。所云汗下失宜。而爲醫所病者。是也。夫夏月欲着複衣者。如五月之時。外陽內陰。故陽氣在表。而胃中虛冷。五月一陰初生。以陽氣內微。不

能勝冷。故欲着複衣也。夫冬月欲裸其身者。如十一月之時。外陰內陽。故陽氣在裏。而胃中煩熱。十一月一陽來復。以陰氣內弱。不能勝熱。故欲裸其身也。所謂其人亡血者。通體脉微。而濇其陰脉。又兼遲濇。故知亡血也。由是而知汗下之宜慎矣。

脉浮而大。心下反鞕。有熱屬藏者。攻之。不令發汗。屬府者。不令溲數。溲數則大便鞕。汗多則熱愈。汗少則便難。脉遲尚未可攻。

此言太陽上合少陰心藏。下合膀胱水府。而汗下宜慎。

也。脉浮而大。陽氣浮而外盛也。浮大之脉。病爲在表。全
心下反鞭。太陽之氣不能從胸出入矣。若有熱屬少陰
心藏者。當攻下之。以瀉心下之熱。不令發汗。而奪其心
液也。有熱屬膀胱水府者。當發汗而運行於膚表。不令
利小便而溲數。若溲數則津液去。而大便鞭。夫有熱屬
藏。雖曰不令發汗。然亦有汗多則熱愈者。夫溲汗皆屬
水津。雖曰溲數。則水津去。而大便鞭。然亦有汗少。水津
不去。而便難者。夫有熱屬藏。雖曰攻下之。然亦有脉遲。
尚未可攻下者。屬藏屬府。所當慎其汗下者如此。

脈浮而洪。身汗如油。喘而不休。水漿不下。形體不仁。乍靜乍亂。此爲命絕也。又未知何藏先受其災。若汗出髮潤。喘不休者。此爲肺先絕也。陽反獨留。形體如烟熏。直視搖頭者。此爲心絕也。唇吻反青。四肢執習者。此爲肝絕也。環口黧黑。柔汗發黃者。此爲脾絕也。溲便遺失。狂言目反直視者。此爲腎絕也。又未知何藏陰陽先絕。若陽氣前絕。陰氣後竭者。其人死。身色必青。陰氣前絕。陽氣後竭者。其人死。身色必赤。腋下溫。心下熱也。

此一節論死絕之脈證。脈浮而洪。陽氣馳也。身汗如油。

陰精洩也。喘而不休。真氣脫也。米漿不下。中土敗也。形體不仁。血氣盡也。乍靜乍亂。陰陽離也。此爲命絕也。又未知何藏先受其災。夫肺主氣而主皮毛。若汗出髮潤。喘不休者。此陰液上脫。生氣下竭。此爲肺先絕也。心爲陽中之太陽。下交于坎水。可相濟而不可獨留。今陽反獨留。有陽無陰也。形體如煙熏。色不榮於身也。心脉上繫于目。心系絕。故有視。火炎上而陽氣孤。故搖頭。此爲心絕也。唇吻者。脾之開竅。反受木尅而色青。四肢者。肝血所養。血液亡而四肢繫習。此爲肝絕也。脾色華于唇。

四白。環口。顰黑者。土不制其水也。柔汗發黃者。土虛水溢。真色外陳。此爲脾絕也。少陰腎藏。下水上火。主神機出入。洩便遺矢。水氣洩也。狂言神氣亡也。夫水之精火之神。共奏于目。目反直視。精神失也。精神失而水火離決。此爲腎絕也。夫五臟者。主藏精神魂魄志意者也。又未知何藏陰陽先絕。當驗死後身色之青赤。青色爲陰。故主陰氣後竭。赤色爲陽。故主陽氣後竭。陽氣陰氣者。神氣精氣也。不曰絕而曰竭者。有有餘不盡之意。故腋

下溫。心下熱也。○愚按仲祖本序云。神明消滅變爲異

物。今必青必赤。腋下溫。心下熱者。神明不消滅也。夫心下者。神所聚。腋下者。氣所出。言神氣從此歸天。此即凝聚爲精。流行爲氣。妙用爲神之義。

寸口脈浮大。而醫反下之。此爲大逆。浮則無血。大則爲寒。寒氣相搏。則爲腸鳴。醫乃不知。而反飲冷水。令汗大出。水得寒氣。冷必相搏。其人卽餒。壹同

合下二節。言寸口跌陽之脈。浮大而虛。醫者不宜汗下也。寸口脈浮大。是爲陽氣有餘。而醫反下之。以洩其陰。此爲大逆。夫氣浮于外。則血虛於內。故浮則無血。陽大

於外則陰乘于內。故大則爲寒。夫在內之寒與在外之陽氣相搏。則中土虛而爲腸鳴。是浮大之脉不可下也。而浮大之脉亦不可汗。醫乃不知血虛內寒。而但知陽氣有餘。反飲冷水。令汗大出。則裏氣本寒。而水得寒氣。兩冷相搏。陰盛陽衰。經氣內阻。故其人卽飢。飢者微呃。無聲之謂。

跌陽脉浮。浮則爲虛。浮虛相搏。故令氣飢。言胃氣虛竭也。脉滑則爲噦。此爲醫咎。責虛取實。守空迫血。脉浮。鼻中燥者。必衄也。

此言跌陽經氣相搏而爲餽。氣虛則噦。經虛則衄。醫者
不宜汗下也。跌陽者陽明之胃脈也。跌陽脈浮。陽明經
脈之不足也。浮則爲虛。陽明胃氣之不足也。浮虛相搏。
經脈之浮。胃氣之虛。兩相搏激。故令氣餽。又申言所謂
虛者。言胃氣虛竭也。胃氣虛竭而脈滑。則爲噦。聚而忽
沉。曰滑。呃而有聲。曰噦。此爲醫咎者。言經氣皆虛。而醫
汗下之所致也。責虛取實者。當責其虛。而取其實。取實
者。下之之意也。守空迫血者。守空于內。而迫其血。迫血
者。汗之之意也。夫胃氣虛則噦。經脈虛則衄。若跌陽脈

浮而鼻中燥者必衄也。

諸脈浮數當發熱而洒淅惡寒。若有痛處。飲食如常者。畜積有膿也。

合下兩節。此節言從肌表而入于經脈。故云畜積有膿。下節言從經脈而出于肌表。故云不能作汗。以徵經氣相通之意。諸脈浮數者。舉三部而言也。浮為在表。數為在肌。故當發熱而洒淅惡寒。若從肌表而入于經脈。血氣凝滯。故有痛處。飲食如常者。胃氣無傷。經脈受邪。故畜積有膿也。愚按太陽脈浮。少陽脈數。少陽屬三焦。通

會元真于肌腠。故數爲在肌。

脈浮而遲。面熱赤而戰惕者。六七日當汗出而解。反發熱者。差遲。遲爲無陽。不能作汗。其身必痒也。

脈浮而遲者。陽氣盛而陰血虛也。面熱赤而戰惕者。陽氣盛。故熱赤。陰血虛。故戰惕。六七日乃從陰出陽之期。故當汗出而解。至此不解。反發熱者。陽氣偏勝。不能即痊。故曰差遲。差遲者。爲陽氣外浮。而不加于裏陰。無陽者。裏無陽也。蓋陽加于陰。謂之汗。無陽則陰無以化。故不能作汗。夫不能作汗。則經脈不外通于肌表。故其身

必痒也。○一說差。當作又。言反發熱者。所以遲味。

寸口脈陰陽俱緊者。法當清邪中於上焦。濁邪中於下焦。清邪中上。名曰潔也。濁邪中下。名曰渾也。陰中于邪。必內慄也。表氣微虛。裏氣不守。故使邪中於陰也。陽中于邪。必發熱。頭痛。項強。頸掣。腰痛。脛酸。所謂陽中霧露之氣。故曰清邪中上。濁邪中下。陰氣爲慄。足膝逆冷。便溺妄出。表氣微虛。裏氣微急。三焦相溷。內外不通。上焦怫鬱。藏氣相熏。口爛食斷也。中焦不治。胃氣上衝。脾氣不轉。胃中爲濁。榮衛不通。血凝不流。若衛氣前通者。小便赤黃。與熱相搏。因

熱作使遊于經絡。出入藏府。熱氣所過。則爲毒膿。若陰氣前通者。陽氣反微。陰無所使。客氣內入。蹙而出之。聲嗝咽。寒寒厥相逐。爲熱所壅。血凝自下。狀如豚肝。陰陽俱厥。脾氣孤弱。五液注下。下焦不閤。清便下重。今使數難。臍築狀痛。命將難全。

合下三節。皆論濕邪。首節言濕邪中于上下。次節言濕邪在中。末節言水停晚發。而其脉皆陰陽俱緊也。寸口脉陰陽者。槩左右三部而言也。三部俱緊。則上下受邪。故法當清邪中于上焦。濁邪中于下焦。上中霧露之邪。

故名曰潔也。下中濕濁之邪。故名曰渾也。中上中下俱屬乎陽。若陰中于邪。內干五藏。三陰之氣必內慄也。夫三陽之表氣微虛。三陰之裏氣不守。故使邪中于陰也。如陽中于邪。必發熱。頭痛項強。頸掣而邪于上。腰痛脛酸而邪于下。蓋三陽之脉皆上絡于頭面頸項而下循於腰膝足脛。俱所謂陽中霧露之氣。故曰清邪中上。濁邪中下也。若陰中于邪。在太陰則陰氣爲慄。陰氣者太陰之所主也。在厥陰則足膝逆冷。足膝者厥陰之所主也。在少陰則便溺妄出。前陰者少陰之所主也。三陽表

氣微虛。以致三陰裏氣微急。微急者。正微而邪急也。夫正氣內微。邪氣外急。是以三焦之氣。不能從內達外。而三焦相溷。內外不通。夫所謂三焦相溷者。如上焦怫鬱。不得陰氣以相滋。則藏真之火氣相熏。故口爛食斷。斷齒根也。食者。如日月之蝕。而缺傷也。如中焦不治。則胃氣不能與之外達而上衝。脾氣不能爲胃轉輸而爲濁。夫榮氣出于中焦而主血。是以榮衛不通。而血凝不流。夫三焦相溷。不言下焦者。藏氣相熏。從下焦而上熏也。夫所謂內外不通者。若衛氣前通于外。則裏氣未和。是

以小便赤黃與熱相搏。此裏熱之在氣分也。若涉於經
脉藏府。則因熱作使。遊行出入。蒸氣所過。則爲癰腫。此
裏熱之在血分也。若陰氣前通於內。在外之陽氣厥微。
夫陽在外。陰之使也。厥微故陰無所使。陰不能使陽。故
客邪之氣。內入於肺。噎而出之。肺氣虛矣。聲啞咽塞。心
氣虛矣。寒厥相逐于外。爲熱所壅于內。則血凝自下。而
狀如豚肝。肝氣虛矣。脾爲孤藏。中央土。以灌四旁。今陰
陽俱厥。灌溉無從。脾氣孤弱而虛矣。腎主五液。從下而
上。今五液注下。下焦不闔。腎氣虛矣。五藏者三陰之所

屬也。邪入三陰。故清便下重。令便數難言。大便清而復下重。令人便數而仍難。此正虛邪陷。故臍築。脹。膈。土氣敗而三陰絕。是以命將難全。夫命將難全。猶未即死。醫誤治之。喪無日矣。

脈陰陽俱緊者。口中氣出。唇口乾燥。踈臥足冷。鼻中涕出。舌上胎滑。勿妄治也。到七日以來。其人微發熱。手足溫者。此爲欲解。或到八日以上。反大發熱者。此爲難治。設使惡寒者。必欲嘔也。腹內痛者。必欲利也。

此承上文之意而言。濁邪在中也。脈陰陽俱緊者。濁邪

在中。上下相持也。口者脾之竅。胃脉挾口。環唇。口中氣出。唇口乾燥。病傷脾胃也。土氣不能旁達于四肢。故跣臥足冷。太陰脾肺不交。故鼻中涕出。脾脉連舌本。散舌下。濕邪在內。故舌上胎滑。此邪干中土。病傷脾胃。非外感之邪。勿妄治也。到七日以來。其人微發熱者。陽明土氣自和也。手足溫者。太陰土氣自和也。故曰此爲欲解也。或到八日以上。反大發熱者。陽氣外馳。非土氣柔和之熱。故曰此爲難治。夫未到八日。而設使惡寒者。乃胃絡外行於肌表。必欲嘔也。嘔則榮飪之邪從上出矣。腹

內癢者乃脾氣內逆于中土。必欲利也。利則濕濁之邪從下出矣。

脈陰陽俱緊。至于吐利。其脈獨不解。緊去入安。此爲欲解。若脈遲。至六七日不欲食。此爲晚發。水停故也。爲未解。食自可者。爲欲解。病六七日。手足三部脈皆至。大煩而口噤不能言。其人躁擾者。必欲解也。若脈和。其人大煩。目重。臉內際黃者。此欲解也。重平聲。

此承上文之意。而言水停晚發。必土氣強。經脈盛。而後解也。脈陰陽俱緊。至於吐利。承上文而言也。其脈獨不

解三語。言雖注利。必緊脈去。而內始安。外始解。若緊去。脈遲。至六七日不飲食。恐中土內虛。濕邪晚發。水者濕之類也。故曰此為晚發。水停故也。為未解。食自可者。土氣強。而水受制。為欲解。病至六七日。緊脈去。而三部脈皆至此。經脈之氣內盛也。大煩。口噤。不能言。其人躁擾者。此胃絡脾絡。皆從心脈而達于四肢。故必欲解。若緊去。脈和。其人。大煩。目重。臉內際黃。為經脈和。而土色見於中央。目重。臉者。眼包之下。位屬中央。故為欲解。雖受濕滿之邪。不慮水停晚發矣。

脉浮而數。浮為風。數為虛。風為熱。虛為寒。風虛相搏。則洒淅惡寒也。

合下三節。首節言風傷氣。次節言熱傷經脉。末節言寒傷形藏也。此言風傷氣。而表陽不和也。本篇云。諸脉浮數。當發熱。而洒淅惡寒。故浮為風。而屬于熱。數為虛。而屬于寒。風虛相搏。則洒淅惡寒。言表陽之氣。為風邪所傷。而虛寒也。

脉浮而滑。浮為陽。滑為實。陽實相搏。其脉數疾。衛氣失度。浮滑之脉。數疾發熱。汗出者。此為不治。

此言熱傷經脈而陽氣外亡也。脈浮而滑。浮爲陽者。陽氣盛也。滑爲實者。陰氣實也。陽實相搏。則陰陽皆盛。故其脈數疾。數疾。則陽氣盛。經脈傷。衛氣失其循行之常度。故衛氣失度。又申言浮滑之脈。而兼數疾。則經脈血氣乖錯于內。其外發熱。汗出。則經脈之氣不通于肌表。肌表之氣不歸于經脈。故曰此爲不治。

傷寒欬逆上氣。其脈散者死。謂其形損故也。

此言寒傷形藏而氣無所歸也。欬逆上氣者。肺藏受邪。上下不通。表裏不和也。夫肺朝百脈。其脈散者。諸經之

氣不能上歸于肺也。故死。又申明所以致死者謂其氣
逆上氣。形藏內損故也。

以上辨脈計四十則。

辨脈法終

平脉法

辨分別也平衡平也篇名辨脉平脉者以比

問曰脉有三部陰陽相乘榮衛血氣在人體躬呼吸出入上下於中因息遊布津液流通隨時動作效象形容春弦秋浮冬沉夏洪察色觀脉大小不同一時之間變無經常尺寸參差或短或長上下乖錯或存或亡病輒改易進退低昂心迷意惑動失紀綱願為具陳令得分明師曰子之所問道之根源脉有三部尺寸及關榮衛流行不失銜銓腎沉心洪肺浮肝弦此自經常不失銖分○入升降漏刻周旋水下百右本刻一周循環當復寸口虛實見焉變化

相乘陰陽相于風則浮虛寒則牢堅沉潛水畜支飲急弦
動則爲痛數則熱煩設有不應知變所緣三部不同病各
異端太過可怪不及亦然邪不空見中必有奸審察表裏
三焦別焉。知其所舍消息診看料度藏府獨見看神爲子
條記傳與賢人。

此節乃平脉之總綱。言營衛血氣有生始之根源。有循
行之道路。三部上下應呼吸而呈象。浮沉遲數。隨四時
以更張。脉度循環合漏刻。虛實變化審陰陽。究之衡銓
不失。銖分不爽。所謂色脉者。上帝之所貴。先師之所傳。

非其人勿授。故曰傳與賁人。○按水下百刻古本係二刻。一周循環者。人身經脈合手足之六陽六陰。與躡脈督脈任脈。計長十六丈二尺。人一呼一吸爲一息。一息則脈行六寸。一日十二時。子午二時每十刻餘俱八刻。則十二時共百刻。以合漏水之下。水下一刻。人一百三十五息。計脈行八丈一尺。水下二刻。人共二百七十息。則脈行十六丈二尺。周于身矣。此爲小周也。一日一夜共五十周。所謂五十度而大周於身。計共一萬三千五百息。漏水下百刻。而脈行八百十丈。大周于身。則榮衛

二氣交相逆順而行。行陽二十五度。行陰二十五度。總
在此十六丈二尺之中。即所謂榮衛流行而不失衡銓
之脉度也。下文呼吸者脉之頭。蓋言脉度之行。而又以
人之呼吸爲首。此診脉之道。亦即呼吸出入而上下于
中之義也。○高子曰。感風寒濕熱之病。而見浮沉牢數
之脉。設有脉病不相應。當知變之所緣。世醫但曰脉證
不相應。不審其所以不應之緣。此爲粗工不明經義。故
不知審變耳。

師曰。呼吸者脉之頭也。初持脉來疾去遲。此出疾入遲。名

曰內虛外實也。初持脉來遲去疾。此出遲入疾。名曰內實外虛也。

此言平脉準于呼吸。審其來去之遲疾。則知內外之虛實也。夫脉者。週身經脉之氣。會聚于兩手之寸關尺。因息而動。故曰呼吸者脉之頭。言以呼出吸入之氣。而爲脉之肇端也。初持脉者。所以平脉也。平脉者。猶秤物而得其平也。來疾去遲。此出疾入遲。出主外。疾主有餘。是爲外實。入主內。遲主不足。是爲內虛。故名曰內虛外實也。若初持脉來遲去疾。此出遲入疾。出主外。遲主不足。

是爲外虛。入主內疾。主有餘。是爲內實。故名曰內實外
虛也。此平脈而得其內外之虛實也。○愚按脈度。雖有
去來。而診脈之法。但診其來。不診其去。且來疾。則去亦
疾。來遲。則去亦遲。今日來疾去遲。來遲去疾者。蓋以呼
出爲來。吸入爲去。人病。則呼吸長短不均。而有來去遲
疾之各異。是以呼吸而爲脈之頭者如此。

問曰。上工望而知之。中工問而知之。下工脈而知之。願聞
其說。師曰。病家人請云。病人苦發熱。身體疼。病人自臥。師
到。診其脈。沉而遲者。知其差也。何以知之。若表有病者。脈

當浮大。今脉反沉遲。故知愈也。假令病人云。腹內卒痛。病人自坐。師到。脉之浮而大者。知其差也。何以知之。若裏有病者。脉當沉而細。今脉浮大。故知愈也。

合下三節。首節言脉而知之。次節言問而知之。末節言望而知之。病家云。發熱身體疼。病人云。腹內卒痛。所謂問也。夫惟問之。是以告之。病人自卧。病人自坐。所謂望也。然雖問望。必以脉之沉遲浮大爲憑。所謂脉而知之者如此。

師曰。病家人來請云。病人發熱煩極。明日師到。病人向壁

臥。此熱已去也。設令脉不和。處言已愈。設令向壁臥。聞師到。不驚起而盼視。若三言三止。脉之嚙唾者。此詐病也。設令脉自和。處言汝病大重。當須服吐下藥。針灸數十百處。病家人來請云。所謂問也。問而告之。知其病矣。故以發熱煩極之證。而至向壁臥。則知熱煩已解。以發熱煩極之證。師到當驚起盼視。出言不休。津液不和。今三言三止。而嚙唾。是爲詐病。即診其脉。不以脉憑。所謂問而知之者如此。

師持脉。病人欠者。無病也。脉之呻者。病也。言遲者。風也。操

頭言者。裏痛也。行遲者。表強也。坐而伏者。短氣也。坐而下
一。脚者。腰痛也。裏實護腹。如懷卵物者。心痛也。強去聲。
師持脉者。猶言師但持脉而不問也。欠者。陽引而上。陰
引而下。此陰陽自和。為無病也。呻者。氣道不利。故太息
以呻出之。此為病也。言遲為風者。風傷氣。氣機不捷。則
言遲也。搖頭言為裏痛者。人之聲音。由腎間之動氣而
發。裏痛則苦于發聲。故搖頭言也。行遲為表強者。太陽
主筋。主表。筋不柔和。表氣強急。則行遲矣。坐伏為短氣
者。呼吸之氣。發原在下。氣短。則上下不相接續。故坐而

伏也。下一脚爲腰痛者。腰之筋脉。與髀骨相連。腰痛則脚不能俱伸。故坐而下一脚也。護腹心痛者。正虛于內。邪實于裏。恐人按之。故護腹如懷卵物。乃心氣不能轉舒。故曰心痛也。此皆察人之神情。得人之病機。雖持脉而不憑脉。所謂望而知之者如此。○愚按扁鵲望齊侯之色。而知死生。華佗聞呻吟之聲。而取毒蛇。此望聞之神者矣。然二子咸得異術。能洞見五藏。滌浣腸胃。神異之術。父不能喻之子。師不得授之弟。是以後世無傳焉。若本論之所謂望聞。乃簡而易。易而難。中庸之道也。聞

聲望形得其病情。何異于洞見五臟。湯圖散劑。切中肯綮。何異于剖腹濯腸。仲祖之遺書。千古垂教之聖經也。
○曹氏曰。望聞之理。自古有之。乃以我之虛靈。而照彼之病情也。脉要篇云。視精明。察五色。觀五藏。有餘不足。六府強弱。形之盛衰。以此參伍。決死生之分者是也。
師曰。伏氣之病。以意候之。今月之內。欲有伏氣。假令舊有伏氣。當須脉之。若脉微弱者。當喉中痛似傷。非喉痺也。病人云。實咽中痛。雖爾。今復欲下利。

此一節言伏氣發病。始則從陰出陽。既則從陽入陰也。

伏氣之病者。春之風氣。夏之暑氣。秋之濕氣。冬之寒氣。感之。則潛匿于募原肌腠之中。不形于脉。故當以意候之。今月之內。欲有伏氣者。是以意候之也。如三春風盛。九夏暑盛。醫者當知今月之內。時令太過。欲有伏氣。感之。則潛匿于形身而為伏氣之病矣。假令舊有伏氣。今時乃發。當須脉之。若脉微弱者。中土內虛。風木之邪相尅也。故當喉中痛似傷。喉者天氣也。痛似傷者。火氣也。此伏邪從陰出陽也。非喉痺者。言非陰寒內閉之喉痺也。病人云。實咽中痛者。喉主天氣。為陽。咽主地氣。為陰。

先病喉痛後病咽痛是先病陽而後病陰也。雖爾今復欲下利者言雖咽痛當復下利所以申明咽主地氣之意。伏氣始病則從陰出陽既病則從陽入陰者如此。問曰人恐怖者其脉何狀師曰脉形如循絲累累然其面白脫色也。

合下三節言脉起于腎生于胃而主于心也。此節言脉起于腎人恐怖則腎氣傷腎氣傷則精不上交于心故脉形如循絲之微而累累然其面白脫色而不光榮也。問曰人不飲其脉何類師曰脉自濇唇口乾燥也。

此節言脉生于胃。經云穀入于胃，脉道乃行。水入于經，其血乃成。人不飲者，胃氣虛也。胃虛故脉自濇。津液內竭，不榮于唇，故唇口乾燥也。

問曰：人愧者，其脉何類？師曰：脉浮而面色乍白乍赤。

此節言脉主于心。心之所藏者神也。人愧則神氣消阻，故脉浮浮者，虛浮也。心氣內歉，故面色乍白乍赤，乍白乍赤者，恍惚而無定也。

問曰：經說脉有三菽六菽重者，何謂也？師曰：人以指按之，如三菽之重者，肺氣也。如六菽之重者，心氣也。如九菽之

重者脾氣也。如十二菽之重者肝氣也。按之至骨者腎氣也。假令下利寸口關上尺中悉不見脉。然尺中時一小見。脉再舉頭者腎氣也。若見損脉來至爲難治。

合下兩節以五藏五行而論脉也。此言診法有以浮中沉候五藏之脉者。有以寸關尺候五藏之脉者。皆爲平脉之法也。菽豆也。三菽者以指按脉形如三菽之重。言其輕取而可得也。六菽九菽十二菽由輕而重由舉而按。以至於骨也。肺氣心氣脾氣肝氣腎氣其部位自上而下。故診法由輕而重由舉而按。此以浮中沉候五藏

之脉者如此。然診法。又有以寸關尺爲候者。故假下利以申明之。假令下利。寸口關上尺中。悉不見脉。是因下利無脉也。然尺中時一小見。脉再舉頭者。因尺中小見。而三部之脉。得以再舉。尺脉主腎。故曰腎氣也。夫尺主腎氣。則關主肝脾之氣。寸主心肺之氣。可不煩言而意會矣。又申言脉再舉頭。一息二至。是爲損脉。若見損脉。來至則爲難治。此以寸關尺候五藏之脉者如此。

問曰。脉有相乘。有縱。有橫。有逆。有順。何謂也。師曰。水行乘火。金行乘木。名曰縱。火行乘水。木行乘金。名曰橫。水行乘

金火行乘木名曰逆。金行乘水木行乘火名曰順也。

五藏者五行也。故上文論五藏。此節論五行。脉有相乘者。言經脉相乘。血氣不和而爲病也。有縱有橫。有逆有順者。言相乘而當則爲縱順。相乘不當則爲橫逆也。水行乘火。金行乘木。巳所勝者而復乘之。則放縱自如。故名曰縱。火行乘水。木行乘金。巳所不勝者而反乘之。則橫行無忌。故名曰橫。若水行乘金。火行乘木。生我者而我反乘之。名曰逆也。金行乘水。木行乘火。我生者而我因乘之。名曰順也。夫五藏屬五行。經脉不和而爲病者。

如此。

問曰。脈有殘賊。何謂也。師曰。脈有弦緊浮滑沉瀆。此六者。名曰殘賊。能為諸脈作病也。

合下兩節。言脈有殘賊。脈有災怪。為諸脈作病。名曰殘賊。變異無常。名曰災怪也。夫脈弦則為臧。脈緊則為寒。脈浮為虛。脈滑為實。沉為純陰。瀆則無血。故弦緊浮滑沉瀆六脈。皆為殘賊之脈。能為諸脈作病。此其所以為殘賊也。

問曰。脈有災怪。何謂也。師曰。假令人病。脈得太陽。與形證

相應。因爲作湯。比遠送湯如食頃。病人乃大吐。若下利腹
中痛。師曰。我前來不見此證。今乃變異。是名災怪。又問曰。
何緣作此吐利。答曰。或有舊時服藥。今乃發作。故名災怪
耳。

脉得太陽與形證相應者。如太陽之爲病。脉浮。頭項強
痛而惡寒。此脉與形證之相應也。大吐下利。腹中痛。前
來原無此證。今卒然變異。是名災怪。或有舊時服藥。今
乃發作者。言送湯如食頃。所投之藥。未過于經。故必舊
時服藥之故矣。

問曰東方肝脉其形何似師曰肝者木也名厥陰其脉微弦濡弱而長是肝脉也肝病自得濡弱者愈也假令得純弦脉者死何以知之以其脉如弦直此爲肝藏傷故知死也。

合下四節言三陰內合五藏皆以胃氣爲本前三節祇言東方肝木南方心火西方肺金末節舉木得金脉而總結之申言他皆倣此者謂書不盡言當以類推之意夫五藏外合五行故曰肝者木也五藏上合三陰故曰名厥陰其脉微弦濡弱而長是肝脉而得木體之條達

也。肝病自得濡弱者，得胃氣也。故愈得純弦，脈者不得胃氣也。故死。平人氣象篇曰：春胃微弦曰平，弦多胃少曰肝病。但弦無胃曰死。此之謂也。

南方心脈，其形何似？師曰：心者火也。名少陰。其脈洪大而長，是心脈也。心病自得洪太者，愈也。假令脈來微去大，故名反病在裏也。脈來頭小本大，故名覆病在表也。上微頭小者，則汗出下微本大者，則爲闕格不通，不得尿，頭無汗者可治，有汗者死。

心病自得洪大者，言心病而脈洪大，自得其位，爲有胃

氣故愈。假令脉來微去大則來去不倫。夫心者火也。火性上炎。脉當來大去微。今來微去大。反其火性。故名反。此心氣內鬱不克于外。故病在裏也。脉來頭小本大。則上下不均。夫心者火也。火性上炎。脉當頭大本小。今頭小本大。是下者反上。上者反下。故名覆。此心氣外虛。不榮于內。故病在表也。上微而脉頭小者。心氣外虛。故汗出下微而脉本大者。心氣內鬱。故關格不通。不得尿。夫關格不尿。若頭無汗者。津液內藏。故爲可治。若頭有汗者。津液上泄。故死。○王氏曰。此言小便不利。名爲關格。

與後章闕則不得小便。格則吐逆。及食不得入。名曰闕格者。少有差別也。○曹氏曰。按素問刺禁篇曰。心部于表。腎治于裏。病在表者。病在心也。病在裏者。病在腎也。心腎皆名爲少陰也。

西方肺脉。其形何似。師曰。肺者金也。名太陰。其脉毛浮也。肺病自得此脉。若得緩遲者。皆愈。若得數者。則劇。何以知之。數者南方火。火尅西方金。法當壅腫。爲難治也。

毛浮者。肺金之本脉也。故肺病自得此脉。又曰。若得緩遲。皆愈者。言肺病自得毛浮者。愈。若肺病得緩遲者。皆

愈也。夫肺病而脉緩遲。既得太陰脾藏之本脉。又得土金之相生。故愈。若得數脉。則金受火刑。故法當壅腫。經云。熱勝則腫。又云。諸病附腫。皆屬于火。火尅肺金。故爲難治。

問曰。二月得毛浮脉。何以處言至秋當死。師曰。二月之時。脉當濡弱。反得毛浮者。故知至秋死。二月肝用事。肝屬木。應濡弱。反得毛浮脉者。是肺脉也。肺屬金。金來尅木。故知至秋死。他皆倣此。

上文三節首節言肝脉濡弱。末節言肺脉毛浮。此言脉

當濡弱之時。而得毛浮之脈。所以承上文而總結之。又
言他皆倣此者。言三時皆倣此相尅之義。而類推之所
以示人引伸之法也。○高子曰。上文三節。以東方肝木
歸于厥陰。南方心火。歸于少陰。西方肺金。歸于太陰。夫
三陰合五藏。五藏合五行。五行主五方。辭未盡而義已
周。學者所當意會者也。○曹氏曰。金來尅木。故知至秋
死。咸謂至秋金旺。肝木氣絕而死。不知春得秋脈。則肺
虛其本位。至秋則金氣虛竭。不能自旺。故死于金。不死
于木。此卽歲運勝復之義。所謂春有慘悽殘賊之勝。則

夏有炎暑燔燥之復。至秋死者。火氣下流于秋。三十日而燦金也。三時皆倣此義而推之。則得之矣。

師曰。脉肥人責浮。瘦人責沉。肥人當沉。今反浮。瘦人當浮。今反沉。故責之。

合下三節。以五行生尅。四時旺氣。而決其死生也。此言人形合脉。宜于其旺。不宜于尅賊也。脉肥人責浮者。以土行敦厚之人。而得如水漂木之浮脉。本尅土矣。故肥人責浮。瘦人責沉者。以木行條幹之人。而得質重如金之沉脉。金尅木矣。故瘦人責沉。此以人形合脉。而言其

尅賊也。肥人當沉者。土生金也。瘦人當浮者。木氣旺也。此以人形合脉而言其生旺也。夫生旺相宜。故曰當尅賊不宜。故曰反以其反也。故責之。

師曰。可脉下不至關為陽絕。尺脉上不至關為陰絕。此皆不治決死也。若計其餘命死生之期。期以月節尅之也。

此言陰陽水火不交會于中土。遇月節相尅而死也。寸脉為陽火也。尺脉為陰水也。關為陰陽之中土也。寸脉下不至關為陽火之氣絕于上。尺脉上不至關為陰水下不至關為陽火之氣絕于下。夫陰陽水火俱交會于中土。今上下皆不

至關則陽絕陰絕。土氣孤危。故皆不治。決死也。若不即死。而餘命苟延。期以月節尅之而死也。

師曰。脉病人不病。名曰行尸。以無王氣。卒眩仆。不識人者。短命則死。人病脉不病。名曰內虛。以無穀神。雖因無害。

旺氣者。五行主四時。木火土金水。四時相生之。王氣也。殺神者。中土水穀之精。而充于形身也。脉病人不病。是形體無傷。而經脉有虧。故名曰行尸。所以名行尸者。以無四時生旺之氣。無旺氣者。春木不生。夏火不生。季土不生。秋金不生。冬水故卒然眩仆。不識。

人者若短命則死。人病脉不病。是形體有虧。而經脉無傷。故名曰內虛。所以名內虛者。以無中土水穀之神。無穀神者。土氣虛也。陰陽合化而穀神自生。故雖困無害。所以申明旺氣而生此穀神者如此。夫人以後天爲本。是穀神能生旺氣也。人以先天爲始。是旺氣能生穀神也。五行相生之理。陰陽合化之微。其義如此。

問曰。翁奄沉名曰滑。何謂也。師曰。沉爲純陰。翁爲正陽。陰陽和合。故令脉滑。關尺自平。陽明脉微。沉食飲自可。少陰脉微滑。滑者緊之浮名也。此爲陰實。其人必股內汗出。陰

下濕也

合下兩節論滑脉緊脉之所由來。此言陽交于陰則翕
奄沉而脉滑。陰交於陽則緊之浮而脉滑也。翕聚也。奄
忽也。翕奄沉者。脉體聚而忽沉。名曰滑也。沉爲純陰者。
少陰也。翕爲正陽者。陽明也。陰陽和合者。陽明之陽。少
陰之陰。兩相和合。戊癸合化。故令脉滑也。關尺自平者。
關脉屬陽明。尺脉屬少陰。陰陽和合而脉滑。故關尺自
平。陽明脉微沉。飲食自可。則關脉平矣。少陰脉微滑。則
尺脉平矣。此言陽交于陰而爲滑脉者如此。夫陽明關

脉微沉是陽交于陰。少陰尺脉微滑。是陰交于陽。故承少陰微滑而申言滑者。乃緊之浮名也。夫陰陽相持其脉則緊緊之而浮。乃從陰出陽。非若翕奄沉之從陽入陰也。此為少陰陰氣內實。其人必股內汗出。陰下濕。是乃陰實之徵。此言陰交于陽而為滑脉者如此。

問曰。曾為人所難。緊脉從何而來。師曰。假令亡汗。若吐。以肺裏寒。故令脉緊也。假令欬者。坐飲冷水。故令脉緊也。假令下利。以胃中虛冷。故令脉緊也。

此言緊脉從陰出陽。則由下而上。從陽入陰。則自上而

下其大義與滑脉相同。故三言假令以申明之。亡汗者陽氣外馳。若吐者。膈氣上逆。假令亡汗若吐。以肺裏寒之所致。是寒邪從陰出。陽由下而上。故令脉緊也。欬者。奔氣促迫。假令欬者。坐以飲冷水之故。是寒邪從陰出。陽由下而上。故令脉緊也。假令下利。以胃中虛冷之所致。是寒邪從陽入。陰由上而下。故令脉緊也。夫陰陽邪正相持。其脉則緊。脉緊未必亡汗。若吐。欬與下利。故曰假令。所以承上文滑脉而言。緊脉之所由來者如此。

寸口衛氣盛。名曰高榮氣。盛名曰章。高章相搏。名曰綱。衛

氣弱名曰慄。榮氣弱名曰卑。慄卑相搏名曰損。衛氣和名曰緩。榮氣和名曰達。緩達相搏名曰沉。

合下六節以寸口論榮衛以跌陽論中土皆宜和緩而
不宜強實也。此節以寸口論榮衛之高章有餘。慄卑不
及。緩達和平也。寸口衛氣盛。榮氣盛者言榮衛之氣盛
而有餘皆出乎陽故名曰高。名曰章。謂崇高而章著也。
一高章相搏名曰綱者。榮衛氣盛。總持一身之大綱也。衛
氣弱名曰慄。慄怯也。榮氣弱名曰卑。卑下也。慄卑相搏
名曰損者。榮衛氣弱而減損于中也。衛氣和名曰緩。緩

徐緩也。榮氣和名曰遲。遲舒遲也。緩遲相搏名曰沉者。榮衛和平。沉實而不虛浮也。此以寸脈論榮衛之有餘不及和平者如此。○愚按以下凡二十節論寸口跌陽少陰之脈。脈之大會在于寸口。故以寸口論榮衛。言三焦藉榮衛之氣而遊行出入。榮衛不相將則三焦無所仰上則宗氣不和。下則少陰脈不出。內則經脈斷絕。外則身體痺不仁。始則從陰而陽。既則從陽而陰。且陰常在絕不見陽。有無聲無臭而歸于太極之義。

寸口脈緩而遲。緩則陽氣長。其色鮮。其顏光。其聲商。毛髮

長。遲則陰氣盛。骨髓生。血滿。肌肉緊薄。鮮艷。陰陽相抱。榮衛俱行。剛柔相得。名曰強也。

此節申明上文緩遲之義。寸口脈緩而遲。承上文而言也。上文云。衛氣和。名曰緩。夫衛為陽而主氣。故緩則陽氣長。其色鮮。其顏光。衛氣充于外也。其聲商。毛髮長。衛氣盛于內也。上文云。榮氣和。名曰遲。夫榮為陰而主血。故遲則陰氣盛。骨髓生。血滿。榮血盛于內也。肌肉緊薄。鮮艷。榮血充于外也。夫衛氣和而緩。榮氣和而遲。則陰中有陽。陽中有陰。陰陽相抱。則榮行脈中。衛

行脉外。故榮衛俱行。陰陽相抱。榮衛俱行。則剛柔相得。而運行不息。故名曰強也。強健也。不息也。

跌陽脉滑而緊。滑者胃氣實。緊者脾氣強。持實擊強。痛還自傷。以手把。必坐作瘡也。

寸口之脉主氣血。故以寸口論榮衛。跌陽之脉主中土。故以跌陽論脾胃。此言跌陽脉滑而緊。主胃實脾強。而自貽其害也。跌陽脉滑。則土氣有餘。故為胃氣實。跌陽脉緊。則陰陽相持。故為脾氣強。夫既滑且緊。是持胃氣之實。而擊脾氣之強。兩土相擊。痛還自傷。猶之以手把。

必而自作刀瘡也。此承上文強健之意而言不可過強者如此。

寸口脉浮而大。浮爲虛。大爲實。在尺爲關。在寸爲格。關則不得小便。格則吐逆。

此承上文過強之意而言陰陽不相交接則爲關格也。寸口脉浮而大。主正虛邪實。故浮爲正氣虛。大爲邪氣實。浮大之脉在于尺。則陰氣不能上交。而關陰于下。故名曰關。浮大之脉在于寸。則陽氣不能下交。而格陽于上。故名曰格。夫關陰而不得陽熱之化。則不得小便。格

陽而不得陰液之資。則吐逆。此承寸口跌陽而并論尺脈者如此。

跌陽脈伏而漐。伏則吐逆。水穀不化。漐則食不得入。名曰關格。

上文以寸尺論關格。此以跌陽論關格也。跌陽者胃脈也。跌陽脈伏而漐。則胃氣不行。故伏則吐逆。而水穀不化。漐則食不得入。而水穀不內。亦名曰關格。○王氏曰。南方心脈節。言不得尿之關格。上節言不得小便而吐逆之關格。此節言吐逆不得食之關格。學者得其經脈。

而治之。遊刃有餘地矣。

脉浮而大。浮爲風虛。大爲氣強。風氣相搏。必成隱癢。身體爲痒。痒者名泄風。久久爲痂癩。

此覆申明浮大之脉。見于寸口。則爲泄風痂癩。非必如上文之吐逆也。脉浮而大。卽上文寸口脉浮而大也。上文浮爲虛者。正氣虛也。此言浮爲風虛者。正氣虛而風薄之也。上文大爲實者。邪氣實也。此言大爲氣強者。風邪在表。而氣機強盛也。風氣相搏于皮膚肌腠之間。故必成隱癢。而身體爲痒。痒者陽也。風乃陽邪。外干皮腠。

故名泄風。久久則從皮膚肌腠而入于經脉。故爲痲癩。痲癩者。厲風也。此申明浮大之脉。非但在寸爲格。且從皮腠入于經脉。而爲泄風痲癩者如此。

寸口脉弱而遲。弱者衛氣微。遲者榮中寒。榮爲血。血寒則發熱。衛爲氣。氣微者。心內飢。飢而虛滿。不能食也。

合下四節。前二節言榮衛內行中土。而下合少陰。後二節言膈氣內行中土。而下合少陰也。此言榮衛不歸中土。而不能食也。弱者衛氣微。言寸口脉弱。而衛氣虛微也。遲者榮中寒。言寸口脉遲。而榮內虛寒也。夫榮爲血。

其氣外交于衛。故血寒則發熱于外矣。衛爲氣。其氣內
交于榮。故衛微者。心內則飢矣。此言榮衛之相交也。夫
榮衛相交。歸于中土。今衛微榮寒。不歸中土。故飢而虛
滿。不能食也。由是而知榮衛之內歸于中土矣。

跌陽脈大而緊者。當即下利。爲難治。當去聲

此言中土不下合于少陰而爲難治也。跌陽者胃脈也。
戊癸合化。下交少陰。跌陽脈大而緊者。胃氣虛而邪氣
實也。陽明戊土不與少陰癸水相交。故當即下利。水陰
下泄。土不柔和。故爲難治。由是而知中土之下合于少

陰矣。

寸口脉弱而緩。弱者陽氣不足。緩者胃氣有餘。噫而吞酸。食卒不下。氣填于膈上也。

此言氣填膈上而不歸于中土也。寸口脉弱者。上焦陽氣不足也。寸口脉緩者。中焦胃氣有餘也。夫陽氣不足。不和于上。則噫而吞酸。胃氣有餘。不和于中。則食卒不下。吞酸不食。由氣填于膈上而不歸于中土之所致也。由是而知膈氣內歸中土。不但榮衛之歸于中土矣。

跌陽脉緊而浮。浮爲氣。緊爲寒。浮爲腹滿。緊爲絞痛。浮緊

相搏。腸鳴而轉。轉即氣動。膈氣乃下。少陰脈不出。其陰腫大而虛也。

此言膈氣下行。少陰之脈不上交于中土。而為陰腫也。跌陽脈緊而浮。乃寒邪內入。而陽氣外出。故浮為氣。陽氣外出也。緊為寒。寒邪內入也。浮為腹滿。陽氣外浮而土虛也。緊為絞痛。寒邪內入而相持也。浮緊相搏。陽氣寒氣兩相搏擊也。腸鳴而轉。陽氣寒氣從中土而行于大腸也。夫腸胃皆屬于土。少陰君火之氣從膈而下。少陰腎水之氣從陰而上。皆歸中土。轉即氣動。膈氣乃下。

是君火之氣。下歸中土。少陰脉不出。其陰腫大而虛。是腎水之氣。不歸中土。水氣不上。聚水而從其頸。故陰器腫大而虛浮也。由是而知少陰之脉。上出于中土。不但中土之下交於少陰矣。

寸口脉微而瀉。微者衛氣不行。瀉者榮氣不足。榮衛不能相將。三焦無所仰。身體痺不仁。榮氣不足。則煩疼。口難言。衛氣虛。則惡寒。數欠。三焦不歸其部。上焦不歸者。噫而酢吞。中焦不歸者。不能消穀。引食。下焦不歸者。則遺尿。

合下四節。前二節言榮衛內合三焦。歸于中土。而遊行。

出入。後二節言榮衛內合心包亦歸中土而上行外達也。此言三焦藉榮衛之相將而遊行出入也。寸口脉微則衛氣虛而不行。不行者不行于脉外也。寸口脉瀉則榮氣弱而不足。不足者不足于脉中也。夫榮行脉中衛行脉外則榮衛相將。榮衛相將則三焦藉榮衛之氣外通肌腠。今榮衛不能相將則三焦之氣不能外出。故無所依仰而身體痺不仁。夫榮主血脉內通于心。榮氣不足而身體痺則煩疼。口難言。衛主皮腠下交于陰。衛氣虛而身體痺則惡寒。數欠始之三焦無所仰則三焦不

能外出。至此身體榮衛皆病。則三焦不能內入。夫三焦所出之處。即三焦所歸之部。上焦出胃上口。故上焦不歸者。噎而酢吞。中焦竝胃中。故中焦不歸者。不能消穀引食。下焦注膀胱。故下焦不歸者。則遺溲。此榮衛不相將。致三焦之不能遊行出入者如此。

跌陽脉沉而數。沉爲實。數消穀。緊者病難治。

此言三焦內合中土。而遊行出入也。跌陽脉沉而數。沉則土氣不虛。故沉爲實。數則火氣有餘。故消穀。上文云中焦不歸者。不能消穀引食。今數消穀。是中焦內歸中

土然三焦之氣貴乎遊行出入。若陰陽相持而脉緊。則入而不出。故又言緊者病難治。此三焦內歸中土以消穀。尤貴遊行出入者如此。

寸口脉微而濇。微者衛氣衰。濇者榮氣不足。衛氣衰。面色黃。榮氣不足。面色青。榮爲根。衛爲葉。榮衛俱微。則根葉枯槁。而寒慄欬逆。唾腥吐涎沫也。

此言榮衛內合心包之血液。從經脉而充于皮膚也。寸口脉微者。衛氣衰微也。寸口脉濇者。榮氣不足也。夫氣主煦之。血主濡之。衛氣衰。榮氣不足。不能合心包之血。

液。從經脈而高。章于上。故面色青黃。青黃者。血虛而不華澤也。夫榮主內。故榮爲根。衛主外。故衛爲葉。今榮衛俱微。則根葉皆病。故根葉枯槁。枯槁者。氣血並竭也。而寒慄。欬逆者。衛氣不充于皮膚也。唾腥吐涎沫者。榮血不充于經脈也。此榮衛皆虛。心包血液。不能從經脈而外充于皮膚者如此。○曹氏曰。同是寸口脈微而濇。上文言榮衛內合三焦之氣。此言榮衛內合心包之血。榮衛俱微。不從包絡而奉心化赤。故唾腥吐涎沫也。

跌陽脈浮而芤。浮者衛氣虛。芤者榮氣傷。其身體瘦。肌肉

甲錯。浮芤相搏。宗氣衰微。四屬斷絕。

此言中土主榮衛陰陽之氣。中土內虛。不能上循宗氣。外行四屬也。愚按上文。皆以寸口論榮衛。跌陽論中土。此節以跌陽論榮衛者。言中土主榮衛陰陽之氣也。跌陽脉浮者。衛氣虛而不歸于中土也。跌陽脉芤者。榮氣傷而不歸于中土也。中土主榮衛陰陽之氣。循行于身體之肌肉。今脉浮芤。故其身體瘦。瘦者。衛氣不充也。肌肉甲錯。甲錯者。榮氣不充也。浮芤相搏。中土內虛。不能上行而循宗氣。故宗氣衰微。不能外達而行四肢。故四

屬斷絕。不曰四肢。而曰四屬者。言四肢屬于身體。因身體瘦。肌肉甲錯之所致也。

寸口脉微而緩。微者衛氣踈。踈則其膚空。緩者胃氣實。實則穀消而水化也。穀入于胃。脉道乃行。水入于經。其血乃成。榮盛則其膚必疎。三焦絕經。名曰血崩。

合下三節。上節言榮血不和于衛。名曰血崩。次節言胃土不合於肺。則為短氣。末節言少陰主氣。主血。心血虛而微煩。陽氣虛而厥逆也。此言榮血秉水穀之精。而外行於膚表也。上章兩言寸口脉微而濇。主榮衛皆虛。此

言寸口脈微而緩。主衛氣疎而榮血不和。故微者衛氣
疎。疎則其膚空。是衛主氣而外行于膚表矣。緩者胃氣
實。實則穀消而水化。是榮血藉胃中之水穀而蒸變矣。
故申言穀入於胃而消。則脈道乃行。水入于經而化。則
其血乃成。夫榮衛貴乎相將。若榮盛不和于衛。則其膚
必疎。是榮衛不相將矣。三焦絕經。是三焦無所仰。不循
經外出矣。夫榮血秉水穀之精而成。外不和於衛。內不
合于三焦。故名曰血崩崩墜也。言不能循經脈而外行
也。

跌陽脉微而緊。緊則爲寒。微則爲虛。微緊相搏。則爲短氣。
此言中土虛寒。不能上合于肺。以司呼吸。則爲短氣也。
跌陽者。陽明之胃脉也。以寒邪而病陽明。故緊則爲寒。
中土虛而脉微。故微則爲虛。既虛且寒。則陽明中土之
氣。不能上合於肺。以司呼吸。故微緊相搏。則爲短氣。
少陰脉弱而瀉。弱者微煩。瀉者厥逆。

此承上文血崩短氣之意。而言少陰主氣主血也。少陰
脉弱。則心血內虛。少陰脉瀉。則生陽不足。弱者微煩。心
血虛而內煩也。瀉者厥逆。生陽不足而厥逆也。少陰下

爲生氣之原。上主心包之血。故主血而主氣者如此。
跌陽脉不出。脾不上下。身冷膚鞭。

合下三節。首節言跌陽脉不出。次節言少陰脉不至。末
節言知陰常在。絕不見陽。以明陽歸于陰。陰歸于純陰。
無聲無臭而歸于太極之義。跌陽者中土也。五藏六府
之所歸也。跌陽脉不出。則藏府之氣不歸中土而外出。
故脾不上下。身冷膚鞭。夫胃爲陽土。脾爲陰土。相爲上
下。行於周身。達于膚腠。今跌陽脉不出。則脾藏之氣亦
不上下。而身冷膚鞭者如此。

少陰脉不至。腎氣微。少精血。奔氣促迫。上入胸膈。宗氣反聚血結心下。陽氣退下。熱歸陰股。與陰相動。今身不仁。此爲尸厥。當刺期門巨關。

此言少陰主心腎。陰陽氣血。少陰脉不至而歸于純陰也。少陰之脉。心腎主之。少陰脉不至。主腎氣微。而精血少。腎氣微。則上下不交。致奔氣促迫。上入胸膈。不能合宗氣。而司呼吸。故宗氣反聚。由是則腎氣宗氣不相交合矣。少精血。則心腎不交。血結心下者。腎氣不交于心。心主之氣。不循經週過。而血爲之下結也。陽氣退下。熱

歸陰股者。腎氣不交于心。陽熱之氣不循經週遍。而反
退歸于陰也。由是則陽入陰中。而惟陰無陽矣。故但與
陰相動。動而不和。故今身不仁。身不仁者。其狀若尸。故
曰此爲尸厥。當刺期門。巨闕者。刺期門。以啟衝脉之氣。
刺巨闕。以啟任脉之氣。衝脉任脉皆起于胞中。從中極
而上。刺之則下陷之陽。庶可從經而上。此假尸厥以明
陽歸于陰。而爲純陰者如此。

寸口脉微。尺脉緊。其人虛損多汗。知陰常在。絕不見陽也。
此承上文陽氣退下。熱歸陰股之意。而言絕不見陽。乃

歸于太極之靜而不動。渾然合一之義。寸口脉微。陽氣
虛于上也。尺脉緊。陽氣加于陰也。陽氣虛於上。故其人
虛損。陽氣加于陰。故其人多汗。虛損多汗。則知陰氣常
在。夫陽生于陰。由靜而動。知陰常在。則動靜皆陰。無聲
無臭。渾然太極。絕不見陽也。但曰絕不見陽。無有後文。
其義深且神矣。誰謂仲祖之書。而可以糟粕求之耶。
寸口諸微亡陽。諸濡亡血。諸弱發熱。諸緊爲寒。諸乘寒者
則爲厥。齧胃不仁。以胃無穀氣。脾滯不通。口急不能言。戰
而慄也。

合下三節論後天水穀之氣以生先天之陰陽血氣而
爲脈所以通結辨脈平脈之義此論寸口諸脈而資生
於脾胃之穀氣也寸口者兩手氣口之脈也論寸脈之
微濡弱緊而曰諸者承通篇寸脈而言也夫寸脈不和
爲病不一槩而言之寸脈屬肺肺主氣故諸微爲亡陽
寸脈屬心心主血故諸濡爲亡血弱爲陰虛陰虛則陽
盛故諸弱發熱緊爲邪入與正相持故諸緊爲寒諸乘
寒者言寒邪內乘正氣不與相持則內外皆寒故爲厥
厥者手足逆冷也鬱胃不仁陽氣虛而內逆不行于上

則鬱胃不出于外。則不仁。夫脉資生于胃。藉後天穀精之氣。注于脾。行于心。出于肺。以生先天之脉氣。今手足厥冷。鬱胃不仁。以胃無穀精之氣。不能內注于脾。則脾滯不通。不能上行于心。則口急不能言。不能外出于肺。則戰而慄也。由是而知先天之脉氣。藉後天之水穀以生者如此。

問曰。濡弱何以反適十一頭。師曰。五藏六府相乘。故令十一。此承上文穀氣之意。而言胃脉濡弱。爲五藏六府之所

資也。濡弱者胃土柔和之脉也。十二經中胃氣為先。故問濡弱之胃氣。何以反適為十一頭。師曰十一者五藏六府也。五藏六府皆藉胃氣以生。是相乘于胃。故令其為十一頭。由是不必疑其反適矣。

問曰。何以知乘府。何以知乘藏。師曰。諸陽浮數為乘府。諸陰遲澁為乘藏也。

此以脉之陰陽而言胃氣之乘于藏府也。何以知乘府。何以知乘藏者。承上文之意。而問何以知胃脉之乘於六府。何以知胃脉之乘于五藏也。師曰。三部之脉浮數

爲陽。遲瀆爲陰。皆有胃氣。諸陽脉而見浮數。爲胃氣乘于六府。諸陰脉而見遲瀆。爲胃氣乘于五藏也。上文論藏府之氣。乘于胃。此言胃氣之乘于藏府。盖左右三部之脉。內合五藏六府。外合三陰三陽。前論陰陽合一歸於太極。此復論後天水穀以生陰陽血氣。夫自始至終。終而復始。皆無中生有之元機。先後二天之妙用。此伊黃伯仲相傳之心法。而醫教垂統之正脉也。

以上平脉計四十五則。